

TUPANAARÜ ORE GA

CHAÛTIÁGU ÜMATÜXÜ

**ChaÛtiágu nüxü narümoxe ga natanüxügü
ga Yudfugü ga yaxögüxü**

1 ¹Pa Chautanüxügü i Yudfugü i Ngechuchuaxü Yaxögüxü i Guxü i Nañewa Ngëmagüxü, choma i ChaÛtiágu pexü charümoxe. Rü choma nixi i Tanatü ya Tupana rü törü Cori ya Ngechuchu ya Cristuaxü chapuracixü.

**Ngëma cuax i aixcuma
Tupanawa ne üxüchiga**

²Pa Chaueneëgü i Yaxögüxü, name nixi na petaaëgüxü i ngëxguma nagüxüraüxü i guxchaxügü pexçax inguxgu. ³Erü pema nüxü pecuax rü ngëxguma meã peyaxögüamagu ega woo ñacü rü guxchaxü pexü üpetügu rü wüxi i mexü nixi i ngëma. Erü ngëmaäcü nixi ya Tupana i pexü naporaexëxü na yexeraäcü meã nüxü peyaxögüxüçax. ⁴Rü name nixi na peporaexü na aixcuma Tupanapexewa pimexüçax, rü naxçaxicatama pemaxëxüçax, rü taxuwama nachixexüçax i perü maxü. ⁵Ngëxguma chi wüxie i petanüwa tama meã nüxü

cuaxgu na ñacü tüxü nanaxwaxexü ya Tupana, rü name nixi i nüxna naxçax taca i cuax, rü nüma tá guxüma i norü ngüchaümaã tüxna nanaxã. Erü Tupana meãma guxü i duüxügüna nanaxã i cuax, rü tama nayanuxü, rü taxüexüma nanga. ⁶Natürü ngëxguma naxçax ítacaxgu rü tanaxwaxe na aixcuma tayaxöxü rü tá na tanayaxuxü i ngëma naxçax ítacaxü. Rü tama name na nagu tarüxñüxü rü täütama tanayaxuxü. Erü yíxema tama meã yaxóxe, rü ñoma taxtüarü yuape i buanecümaã guxüwama çuexürü tixi i tümaärü maxüwa. ⁷⁻⁸Rü yíxema duüxë ya ñuxma meã yaxóxe rü moxü rü tama meã yaxóxe, rü taxucürüwama nagu tarüxñü na ñacü Tupanaxütawa tayaxuxü. Erü yíxema duüxë ya ngëmaäcü yaxóxe, rü tümaärü maxüwa rü tama aixcuma wüxigutama tarüxñü. ⁹Rü yíxema yaxóxe ya tama muärü diëruáxe, rü name nixi i tataaë erü Tupanaxäcü tixi rü tümamaã nataaë. ¹⁰Rü yíxema yaxóxe ya muärü diëruáxe rü name nixi i tataaëama ega woo wüxi i ngunexü düxwa tüxü natauxgu i

tümaärü dīeru. Erü ngēma dīeruáxũ i duũxũgũ, rü ñoma putürachacurũũ tama natai. ¹¹Rü ngēxguma nangunagũgu ya üaxcü rü poraäcü nanguxetũgu, rü narüñexē i ngēma putūra rü narũngu i nachacu, rü ngēxma nagux na namexũ. Rü ngēxgumarũũ tá ta nayu i ngēma dīeruäxũchixũ rü ngēxma tá nayarũxo i norü guxũma.

**Tupana tüxũ naxũ, natürü tama
chixexũmaã tüxna naxĩnũ**

¹²Rü nataãe ya yima yatü ya meãma yaxõomacü i ngēxguma Tupana nüxũ üxgu. Erü ngēxguma ngēmaäcü yaxna namaã naxĩnüãmagu, rü Tupana tá namaã nataãe rü tá nüxna nanaxã i norü ãmare i mexũ i taguma gúxũ. Rü ngēma nixĩ i ãmare i Tupana tümamaã ixunetaxũ ya yíxema nüxũ ngechaũgũxe. ¹³Natürü ngēxguma tacü nüxna ñũgu ya wüxi ya yatü na chixexũ naxũüçax rü tama name na:

“Tupana choxna naxĩnũ”, ñaxũ. Erü Tupana rü taguma nagu narüxĩnũ na chixexũ naxũxũ rü taxúenama naxĩnũ na chixexũ taxũxũçax. ¹⁴Natürü ngēma chixexũ i tümatama nagu tarüxĩnũxũ nixĩ i tüxna ñũxũ rü chixexũgu tüxũ ngxũẽxũ. ¹⁵Rü ngēma chixexũ i tümatama nagu tarüxĩnũxũ nixĩ i tüxũ pecaduãxũẽxũ. Rü ngēma pecadugagu nixĩ i düxwa itayarütaxuxũ. ¹⁶Pa Chaueneëgũ ya Pexũ Changechaũgũxex, tama name i pegütama pewomüxẽgũ. ¹⁷Erü guxũma i ngēma aixcüma mexũ i tüxũ ngēxmaxũ, rü naxũtawa ne naxũ ya Tupana ya daxũgucü ga naxücü ga üaxcü rü tauemacü rü woramacurigü rü

ẽxtagü. Rü nüma rü guxũguma nanaxãixrügumaraxũ rü taguma naxüchicüü. ¹⁸Rü nüma nixĩ ga tüxna naxããxũ ga norü ore i aixcüma ixĩxũ na ngēmaäcü tüxũ nangēxmaxũçax i maxũ i taguma gúxũ. Rü yemaäcü nanaxü yerü nanaxwaxe na yixira nüxũ na yaxõgũxũ, rü yixcama i togü.

Ñuxäcü aixcüma Tupanaãxũ tayaxõ

¹⁹Pa Chaueneëgũ ya Pexũ Changechaũgũxex, rü ngēxguma texé pemaã nüxũ ixuxgu i Tupanaärü ore, rü name nixĩ i meã iperüxĩnũ. Rü tama name i tüxũ pechoxũgagü. ²⁰Erü ngēxguma nanuxgu i wüxi i duũxũ, rü tama Tupanaärü ngúchaũ naxü. ²¹Rü ngēmacax name nixĩ i nüxũ perüxoe i guxũma i ngēma chixexũgü i guxũwama ngēxmagũxũ. iRü meã penayaxu i ngēma ore i Tupana pexna äxũ! Erü ngēmawa pexũ nangēxma i maxũ i taguma gúxũ. ²²Rü tama name i iperüxĩnũẽmare i ngēma ore, natürü name nixĩ i penaxü i ngēma pemaã nüxũ yaxuxũ. Erü ngēxguma iperüxĩnũẽmaregu rü tama penaxũxgu, rü pegütama pewomüxẽgũmare. ²³Erü yíxema irüxĩnũmarexe i Tupanaärü ore natürü tama naxũxe i ngēma nüxũ yaxuxũ, rü wüxi i yatü i daucüwa nügü dauchametüxũrũ tixĩ. ²⁴Erü nügü nadauchametü, natürü ngēxguma yaxũgachigu rü marü nüxũ inayarüngüma na nañuxchametüraũxũ i noxrix. ²⁵Natürü yíxema guxũguma meã nüxũ daumatüxe rü naga ñũxē i ngēma ore i aixcüma ixĩxũ i pecaduwa tüxũ ínguxuchixẽxũ, rü Tupana rü tá aixcüma guxũwama tüxũ narüngũxẽ.

Erü tama ngëma orexũ taxĩnũmare, natürü tanaxü i ngëma tũmamaã nüxũ yaxuxũ. ²⁶Rü ngëxguma chi wüxie nagu rüxĩnũgu na meãma Tupanaxũ tacuáxũ natürü tama nüxna tadauxgu ya tũmaärü conü i tũmaärü orewa, rü tũgũtama tawomüxëë, rü tama aixcũma Tupanaãxũ tayaxõ. ²⁷Natürü ngëma nacũma i Tanatü ya Tupanapexewa aixcũma üünexũ, rü ngëma nixĩ na nüxũ tarũngũxëëxũ i tacutagü rü yutegũxũ rü tũgũna tadauxũ na tama ñoma i naãneärü chixexũgu taxücuxũ.

Name nixĩ i guxũ i duũxũgũxũ tangechaũ

2 ¹Pa Chaueneëgũx, pema rü nüxũ peyaxõgü ya törü Cori ya Ngechuchu ya Cristu ya mexëchicü. Rü ngëmacax tama name na chixriãcü penayaxuxũ i ñuxre i duũxũgü rü meã penayaxuxũ i togü. ²Rü ngëxguma chi perü ngutaquexegu naxücuxgu i wüxi i yatü i uirumaã aneraãxũ rü mexchiruxũ, rü ngëxgumarũ chi ta ngëxma naxücuxgu i wüxi i yatü i ngearü dïëruáxũ rü wëxachiruxũ, rü name nixĩ i guxũxũma wüxigu meã peyaxu. ³Natürü tama name ega meã penayauxgu i ngëma mexchiruxũ rü:

“iNuã mexũ i naxmãxwëxewa rüto!” ñapegũxũ nüxũ, natürü ngëma wëxachiruxũxũ rü:

“iCuma rü ngëxmatama nachĩ, rü exna yea ñatũanewa rüto!” ñapegũxũ nüxũ. ⁴Rü ngëxguma tama wüxigu meã penayauxgu i ngëma taxre, rü pewatama nangox na tama aixcũma guxãxũ pengechaũgũxũ rü chixexũ i duũxũgü pixĩgũxũ ega ngëmaãcü chixri penayauxgu i duũxũgü. ⁵Pa Chaueneëgü

ya Pexũ Changechaũgũxex, iIperixĩnũë i ñaã ore! Tupana tũxũ nidexechi ya yĩxema ngearü dïëruãxgũxe i ñoma i naãnewa na meã nüxũ tayaxõgũxũcax. Erü nanaxwaxe i tanayauxgü i ngëma maxũ i taguma gũxũ i tũmamaã inaxunetaxũ ya yĩxema nüxũ ngechaũgũxe. ⁶Natürü pema rü chixri penayaxu i ngëma duũxũgü i ngearü dïëruãxgũxũ rü meã penayaxu i ngëma duũxũgü i dïëruãxgũxũ. ¿Taux exna ngëma dïëruãxgũxũ yĩxũ i ngëma chixri pemaã maxëxũ rü ãëxgacũgũxũtawax pexũ iyaxuaxũgũxũ? ⁷Rü ngëma dïëruãxgũxũ nixĩ i chixexũ namaã ixugũxũ ya Cristu ya perü Cori ya mexëchicü. ⁸Tupanaärü orewa nangëxma i norü mu i guxũ i mugüarü yexeraxũ i ñaxũ:

“iNüxũ nangechaũ i cumücü ngëma na cugũtama cungechaũxũrũũ!”

ñaxũ. Rü ngëxguma aixcũma naga pexĩnũëgu i ngëma mu, rü mexũ pexü. ⁹Natürü ngëxguma meã penayauxgu i wüxi i yatü i mexchiruxũ rü chixri penayauxgu i ngëma wëxachiruxũ, rü pecadu pexü. Rü Tupanapexewa pechixexũgu erü tama naga pexĩnũë i ngëma pexũ namuxũ. ¹⁰Erü ngëxguma chi texé naga ñnũgu i guxũma i Tupanaärü mugü natürü chi wüxiwatama ítatũxgu na tama naga taxĩnũxũ, rü chi ñoma guxũma i Tupanaärü mugüga tama taxĩnũxũrũũ tachixexũgu. ¹¹Erü nümatama ya Tupana ga ñacü:

“iTãütáma naĩ i nge i ãtecũmaã cungëãë!” ñacü, rü ñanagürü ta:

“iTãütáma cumãëta!”

ñanagürü. Rü ngëxguma chi tama naĩ i nge i ãtecümaã cungeãëxgu, natürü cumáëtagu, rü tama aixcüma meã naga cuxĩnũ i ngëma Tupana tũxũ muxũ. ¹²Rü ngëmacax name nixĩ na meã pidexagũxũ rü meã pemaxëxũ. Erü Tupana tá pexna naca i perũ maxũchiga ngoxi Cristu pexũ muxũácüma pemaxë rü exna tama. Rü ngëma Cristu tũxũ muxũ nixĩ na yigü ingechaũgũxũ. ¹³Erü guxãma ya yixema tama tümamücügü tũxũ ngechaũtümũgũxe, rü Tupana rü tãütãma nũxũ tangechaũtümũgũácüma tũxna naca i tümããrũ maxũchiga. Natürü yixema tümamücügü tũxũ ngechaũtümũgũxe, rü tãütãma tamuũë i ngëxguma Tupana tũxna caxgu, erü nũxũ tangechaũtümũgũácüma tá tũxna naca.

Ega aixcüma yaxögügu, rü tanaxwaxe i mexũ taxügü rü nũxũ tarüngũxëë i togü

¹⁴Pa Chaueneëgũx, ¿Tacüwa namexũ ega wüxie:

“Choma rü Tupanaãxũ chayaxõ”, ñagügu, natürü tama mexũ taxũxgu? ¿Pexcax rü Tupana tá tũxũ maxëëxũ ega ngëmaãcü tayaxõxgu? ¹⁵⁻¹⁶Rü ngëxguma chi wüxi i taeneë rü exna taeyax i yaxõxũ rü nangexchirugu rü nangewemügu, rü chi wüxie i pema rü ñapegügu:

“iMexũ cuxũ üpetü, rü icuxcuchi na tama cuxũ nadeyuxũcax, rü meã nachibũ!” ñagügu, rü ¿tacüwa name i ngëma ega tama nũxna tanaxãxgu i ngëma nũxũ taxuxũ? ¹⁷Rü ngëxguma yaxõmaregu natürü tama mexũ ixũxgu, rü tama togũxũ rüngũxëëgu, rü ¿tacüwa namexũ i ngëmaãcü na yaxõxũ? ¹⁸Erü

ngëxguma cuyaxõmaregu natürü tama mexũ cuxũxgu, rü ngürüãchi tá wüxie ñatarügü cuxũ:

“Cuma rü cuyaxõmare natürü choma rü chayaxõ rü ñuxũchi mexũ chaxü ta. Rü ¿ñuxãcü tá nũxũ chachuãxũ na cuyaxõxũ ega tama mexũ cuxũxgu? Natürü choma rü chorü ü i mexũmaã tá cuxũ nũxũ chadauxëë na aixcüma chayaxõxũ”, ñatarügü tá cuxũ. ¹⁹Cuma cuyaxõ na nangëxmaxũ ya wüxitama ya Tupana. Marü name. Natürü ngoxogü rü ta ngëmaãcü nayaxögü, rü poraãcü niduxruxe erü Tupanaxũ namuũë. ²⁰Pa Yatü ya tama Meã Nagu Rũxĩnũcux, cuma rü tama nũxũ cucuax i ngëxguma cuyaxõmaregu rü tama mexũ cuxũxgu, rü taxuwama name i ngëmaãcü na cuyaxõxũ. ²¹Tupana nũxũ ixuxgu rü nuxcümaãcü ga tórü õxi ga Abrãü rü wüxi ga yatü ga mecü nixĩ. Yerü mexũ naxü rü Tupanaga naxĩnũ ga yexguma namaã nũxũ yaxuxgu na naxcax yamaãxũcax ga nane ga Ichaá. ²²Rü ngëmawa nũxũ tacuax rü tama nayaxõmare ga Abrãü, natürü mexũ naxü ta. Rü yema naxũxüwa tũxũ nũxũ nacuaxëë na aixcüma Tupanaãxũ yaxõõxũ. ²³Rü yemaãcü ningu ga yema ore ga ümatũxũ ga ñaxũ:

“Abrãü rü Tupanaãxũ nayaxõ rü yemacax Tupana nũxũ nixu na mecü yĩxũ yerü nũxũ nayaxõ. Rü nũxũ nixu ta na namücü yĩxũ ga Abrãü”.

²⁴Rü ngëmawa nũxũ tadau na Tupana namaã taãëxũ ya yima yatü ya mexũ ücü rü tama yaxõmarecü. ²⁵Rü yemaãcü ta ngĩmaã nangupetü ga nuxcüma ga Raá. Rü Tupana ngĩmaã nataãë yerü

mexũ ixũ ga yexguma meã nayauxãgu ga ngĩpatawa ga yema orearũ ngeruũgũ ga Yudfũgũ. Rũ ngĩgagu namaxẽ ga yema orearũ ngeruũgũ yerũ to ga namagu iyamugũ ga yexguma norũ uwanũgũ nadaixchaũgu. Rũ woo ga ngĩma rũ chixri na namaxũxũ ga noxrix, natũrũ mexũ ixũ yerũ iyaxõ, rũ yemacax Tupana ngĩmaã nataãẽ. ²⁶Rũ wũxi i naxũne rũ taxuwama name rũ nayumare ega nataxuguma i naãẽ. Rũ ngẽxgumarũũ ta nixĩ na taxuwama namexũ na yaxõmarexũ ega taxuũma i mexũ ixũxgux.

Tórũ conũchiga

3 ¹Pa Chaueneẽgũx, tama name i muxẽma i pema rũ ngxũẽtaexũgũ pegũ pixĩgũxẽẽchaũ. Erũ pema nũxũ pecuax na yixema i ngxũẽtaexũgũ na ixĩgũxũ, rũ guxũ i duũxũgiarũ yexera tá tũxna naca ya Tupana tórũ maxũchiga rũ tórũ puracũchiga. ²Guxãma i yixema rũ muẽxpũxcũna chixexũ taxũe. Yima yatũ ya taguma chixexũxũ ixucũ rũ aixcũma mecũ nixĩ, erũ nũxũ nacuax na ñuxãcũ guxũwama nũgũna nadauxũ na tama chixexũ naxũxũcax. ³Rũ ngẽma na taga naxĩnũxũcax i wũxi i cowaru, rũ tanaxwaxe na naxũtũxũnáguxũ na ngẽmaãcũ yixema inaxwaxexũãcũma meã iyaxũxũcax. ⁴iDũcax nagu perũxĩnũẽ ya wapurugũ ya buanecũarũ poramaã ixũxũne! Rũ woo nitaxũchi rũ buanecũ ya taxũchicũmaã inicuegũ, natũrũ fracũ ya quiyamaã nanatoxchinũ i norũ toxpexeruũ, rũ ngextã nũma ínanaxwaxexũwa nanaxũxẽ. ⁵⁻⁶Rũ ngẽxgumarũũ ta nixĩ ya tórũ conũ rũ woo na naxĩrachirẽxũ, natũrũ namuxũchi i norũ ore. Rũ wũxitama i

ũxũiarũ yauraxũ i íraxũwa inaxũgũ na yaxaxũ i taxũma i naãne. Rũ tórũ conũ rũ ñoma wũxi ya ũxũrũ nixĩ. Rũ taxũnewa rũ wũxi i taxũ i chixexũ nixĩ ya yima tórũ conũ erũ nanachixexẽẽ i guxũma i tórũ maxũ. Rũ ngẽma Tupana ngoxogũxũ ípoxcuexũgune ya ũxiemawa ne naxũ i ngẽma chixexũ i namaã yadexaxũ ya tórũ conũ. Rũ ngẽma chixexũmaã nanachixexẽẽ i guxũma i tórũ maxũ. ⁷Duũxũgũ rũ nũxũ nacuax na íyapuxẽẽãxũ rũ nũxna nachogũxũ i nagũxũraũxũ i naẽxũgũ i idũraexũ, rũ werigũ, rũ áxtapegũ, rũ choxnigũ. ⁸Natũrũ taxũema nũxũ tacuax na nũxna tachogũxũ ya tũmaãrũ conũ. Erũ wũxi i chixexũ i taxũ i taxucũrũwama texẽ iyarũxoxẽẽxũ nixĩ. Rũ ngẽma norũ dexa rũ ũũrũ tũxũ nayuxẽẽ. ⁹Rũ yima tórũ conũmaã nũxũ ticuaxũũ ya Tanatũ ya Tupana, rũ yimamaãtama chixexũ namaã tixugũe ta i duũxũgũ i Tupana nũgũãcũ ũxũ. ¹⁰Rũ ngẽma taaxmaã, rũ meã duũxũgũchiga tidexagũ, natũrũ ngẽmatama taaxmaã rũ namaã taguxchigagũ ta. Pa Chaueneẽgũx, tama name na ngẽmaãcũ yĩxũ. ¹¹Wũxi i dexaarũ chuxchuxũwatama rũ taxuacũma ínaxũxũ i dexá i mexũ rũ dexá i chixexũ. ¹²Pa Chaueneẽgũx, wũxi i iguera rũ taxuacũma orĩbuarũ omaã naxo, rũ wũxi i uba rũ taxuacũma igueraarũ omaã naxo. Rũ ngẽxgumarũũ ta wũxi i dexaarũ chuxchuxũ i yucũrachĩũxũwa, rũ taxuacũma ínaxũxũ i dexá i mexũ.

Ngẽma cuax i aixcũma íxĩxũ

¹³Ngẽxguma chi petanũwa nangẽxmagu i wũxi i duũxũ i nũxũ cuaxũ rũ meã naãẽxũ cuaxũ, rũ name nixĩ na meã namaxũxũ rũ mexũ na

naxûxû rû tama nûgû yacuaxûûxû na ngêmaâcû pexû nûxû nadauxêëxûcax na aixcûma wûxi i duûxû i nûxû cuâxû yîixû. ¹⁴Natürü ngêxguma chi pixâûxâchiwaxegûgu rû togûchi pexaiegu rû norû yexera pegû pixîxêëchaûgu, rû taxuacûma pegûgu perûxîniûe na mexûgû rû nûxû cuaxgûxû pixîgûxû. Rû wûxi i dora i taxû nixî i ngêma ega ngêmaâcû pixîgûgu. ¹⁵Erû ngêma na ixâûxâchiwaxegûxû rû duûxûgûchi na ixaixû rû norû yexera yigû na ixîgûxêëchaûxû, rû tama Tupanawa ne naxû, natürü ñoma i naânecûâxwa rû ngoxo i Chatanáwa nixî i ne naxûxû. ¹⁶Erû ngextá âûxâchi ítaxûwa rû duûxûgû nûgû írüyexeraxêëchaûxûwa, rû ngêma rû taxuûma meâ inixû rû nagûxûraûxû i chixexû nangêxma. ¹⁷Natürü guxâma ya yîxema aixcûma tûxû nangêxmaxê i ngêma cuax i Tupanawa ne ûxû, rû aixcûma meâ tamaxê rû guxâmaâ tamecûmagû, rû meâ duûxêxû tayauxgû i tûmapatawa, rû meâ itarûxîniûe i tûmamûcüarû ucuxê, rû guxû i duûxûgû tûxû nangechaûtûmûûgû, rû guxâmaâma tûgû tawûxiguxêëgû, rû tixaixcûmagû, rû mexû taxûgû. ¹⁸Rû yîxema naxcax daugûxe na duûxûgû nûgûmaâ irûngûxmûêxû, rû wûxi i mexû taxûgû. Erû ngêmawa tá nûxû tadaugû na aixcûma meâ Tupanacax namaxêxû i ngêma duûxûgû.

**Duûxûgû i ñoma i naâneârû
ngûchaûcax daugûxûchiga**

4 ¹¿Tûxücüû pegûmaâ penuê rû pegû pedai? Pegûmaâ penuê erû pexû nangêxma i ngêma perû ngûchaûgû i

chixexûgû. ²Pema pexû nangûchaû i ngêma pexû taxuxû natürü taxuacûma pexû nanguxû, rû ngêmacax peyamax i togû. Rû norû ngêmaxûcax pixâûxâchie natürü taxuacûma pexû nanguxûêga, rû ngêmacax pegûmaâ penuê, rû pegû pedai. Rû tama penayauxgû i ngêma penaxwaxexû erû tama Tupanana naxcax peca. ³Rû ngêxguma naxcax ípecaxgu, rû tama penayaxu, erû naxcax ípeca i ngêma tama Tupana pexû naxwaxexû. Rû ngêma pematama penaxwaxexû nixî i naxcax ípecaxû na namaâ pegûtama petaêëxêëmarexûcax. ⁴Pa Duûxûgû i Chixri Maxêxû, ¿Tama exna nûxû pecuax rû ngêxguma ñoma i naânexû pengechaûgu rû Tupanamaâ perûxuwaniûxû? Erû texé ya ñoma i naânexû ngechaûxê rû Tupanamaâ tarûxuwaniû. ⁵Rû tama natûcaxma nixî i ngêma Tupanaârû ore i ñaxû:

“Ngêma Naâe i Üünexû i Tupana tûxna muxû rû tûxû ninuxû erû noxrû tixî rû tûxû nangechaû”, ñaxû. ⁶Natürü Tupana rû tûxû narûngûxêë na namaâ iporaexûcax i guxûma i ñoma i naâneârû ngûchaû i chixexû. Rû ngêmacax norû orewa rû ñanagûrû:

“Tupana rû tûmamaâ nanu ya yîxema tûgû írûtagûxe, natürü tûxû narûngûxêë ya yîxema tûgû írûxíragûxe”,

ñanagûrû. ⁷Pa Chaueneêgûx, ¡Meâ Tupanaga pexîniûe! ¡Rû nûxû pexoó i ngoxo i Chataná! Rû nûma rû tá pexna niña. ⁸iTupanana pengaicamagû! Rû nûma rû tá ta pexna nangaicama. Rû pemax, Pa Pecaduâxgûxûx, inûxû perûxoe i pecûma i chixexû! Rû pemax,

i Tupanawe rüxixchaũxẽ natürü ñoma i naãnewe rü ta rüxixchaũxẽ, ipenamexẽx i perü maxũ na Tupanaçaticatama pemaxẽxũçax!

⁹iPegümaã pengechaũgü rü pexauxe erü pipecaduãx! Rü texé ya ñoma i naãneärü taãewa cugũxe, rü name nixĩ i tügümaã taxauxe. Rü texé ya tũmacüma i chixexũmaã taãxẽx, rü name nixĩ i Tupanapexewa tügümaã tangechaũ.

¹⁰Rü name nixĩ i Cori ya Tupanapexegu pecaxãpũxügü rü namaã nüxũ pixu na taxuwama pimexũ. Rü ngëxguma i nũma rü tá pexũ nicuaxũü rü pexũ nataxẽ.

Tama name i chixexũgu cueneẽmaã curüxĩnũ

¹¹Pa Chaueneẽgũx, iTãxũ i chixexũmaã pegü pixugũxũ! Erü yĩxema chixexũmaã tũmaẽneẽchigagu idexáxe rü exna chixexũmaã nüxũ dawenũxẽ, rü chixe nüxũ tawogü ta i Tupanaärü ore. Rü ngëxguma chixexũgu Tupanaärü oremaã curüxĩnũgu, rü Tupanaärü oreärü yexera cugü quixixẽẽchaũ erü tama aixcũma naga cuxĩnũ.

¹²Tupanaxĩcatama nixĩ ya tũxna naxãcü i norü mugü rü ñuxũchi tá tũxna çacü rü ngoxi naga ixĩnũ i ngẽma norü ore. Rü nũmatama nixĩ i nüxũ nangẽxmaxũ i pora na tũxũ namaxẽẽxũ rü exna tũxũ nayuxẽẽxũ. ¿Natürü texé quĩxũ i cumax rü ngẽmacax cunangugũxũ na ñuxãcü namaxũxũ i cumücü?

Taxüema nüxũ tacuax na çacü tá tũxũ ngupetũxũ i moxũärü ngunexũgu

¹³iChoxũ iperüxĩnũ i pema na ñapegũgũxũ:

“Ñuxma rü exna moxũ tá nái ya iãnewa taxĩ, rü wũxi ya taunecü tá ngëxma tayayaxu, rü tá ngẽma tataxegü na mucü i diëru ngĩxũ iyaxuxũçax”, ñaperügügü! ¹⁴Pema rü tama nüxũ pecuax na çacü tá pexũ üpetũxũ i moxũ. ¿Çacü nixĩ i perü maxũ? Perü maxũ rü ñoma wũxi i cherena i paxaãchi nüxũ idauxũ rü ngëxgumatama ngupetũxũrũ tá inayarũxo. ¹⁵Rü narũmemaẽ nixĩ na ñapegũxũ:

“Ngëxguma chi nanaxwaxegu ya Cori ya Tupana na imaxẽxũ, rü chi tanaxü i ñaã puracü i nagu rüxĩnũẽxũ”, ñapegũxũ. ¹⁶Natürü i pema rü pegü picuaxũũgũchaũ. Rü guxũma i ngẽma rü tama name. ¹⁷Yĩxema nüxũ cuáxe na ñuxãcü Tupanapexewa meã tamaxũxũ, natürü tama naxũxe, rü pecadu taxü.

Ucuxẽ i diëruãxgũxũçax

5 ¹Pa Duũxũgü i Diëruãxgũxũx, iIperüxĩnũ i ñaã ore! iPexauxe rü aita pexüe erü chixexũ tá pexũ naxüpetü! ²Perü ngẽmaxũgü rü marü nangaue, rü ngẽma pexchiru i mexẽchixũ rü nawe nanangómũ. ³Perü uiru rü perü diëru rü ngëxma naxãütanü rü ngëxma nangaue. Rü ngẽma norü ãütanü rü wũxi i perü cuaxruũ tá nixĩ na pema rü tá ta ipeyarütauxexũ ñoma çacü üxüwa ixaxũrũ. Tupana ngĩxũ nadau i perü diëru i ngĩmaã penguũxcü, rü ngẽmacax tá pexũ napoxcu i naãneärü guxgu. ⁴Rü yema perü puracütanũxũ ga tama meã nüxũ penaxütanũxũ, rü ñuxma rü ngĩxcax nidexagü ga yema diëru ga tama nüxna ngĩxũ pexãcü. Rü Tupana ya guxãärü Cori rü ngẽma duũxũgũxũ naxĩnũ na

ngĩxcax yadexagũxĩ ga yema dĩẽru ga nũxũ ngĩxũ pengetanũcũ ga peanewa na napuracũexũcax. ⁵Rũ ñoma i nañewa rĩ pegũ pengaxãẽgũ rĩ pemepata rĩ pemuãrũ ngẽmaxũãxgũ rĩ petaãẽgũ rĩ meã pechibũe. Natĩrũ nawa tá nangu na ngẽmacax Tupana tá pexũ poxcuexũ. ⁶Rũ pema penapoxcue rĩ penadai i ngẽma duĩxũgũ i taxuũma i chixexũ pemaã ũchirẽxũ. Rũ nũmagũ rĩ pexũ narĩturamaẽgũ, rĩ taxuacũma nũgũ ĩnapoxũgũ.

Tanaxwaxe i tayumũxẽ rĩ meã ĩtananguxẽẽ ya Cori ya Tupana

⁷Rũ ñuxma Pa Chaueneẽgũx, rĩ name nixĩ i meã ĩpenanguxẽẽ ñuxmatata ĩnangu ya Cori ya Tupana. Rũ dũcax, yĩxema nañewa puracũxe rĩ meã ĩtananguxẽẽ ya pucũ na naxũgũxũcax i tũmanetũ. Rũ ñuxũchi ñuxre ya tauemacũ ĩtananguxẽẽ na nayaxũ i tũmanetũarũ o, rĩ ngẽxguma rĩ tá tayabuxgũ. ⁸Rũ pema rĩ ta penaxwaxe na meã ĩpenanguxẽẽxũ na ĩnanguxũ ya Cori ya Tupana. ĩRũ petaãẽgũ, rĩ tãxũ i nũxũ perũchauexũ na ĩpenanguxẽẽxũ! Erũ marũ ningaica na ĩnanguxũ ya tóru Cori. ⁹Pa Chaueneẽgũx, name nixĩ i nũxũ perũxoe na pegũchigaxũ pixuechaũ na tama ngẽmacax pexna naçaxũcax ya Tupana. Erũ marũ ningaica na ĩnanguxũ na duĩxũgũxũ yacagũxũcax i norũ maxũchiga. ¹⁰Pa Chaueneẽgũx, name nixĩ i nũxna pecuaxãchie ga yema nuxcũmaũgũxũ ga Tupanaãrũ orearũ uruũgũ ga na ñuxãcũ yaxna namaã naxĩnũẽxũ ga yexguma ngũxũ yangegũgu. Rũ name nixĩ i pema rĩ ta ngẽxgumarũx yaxna namaã

pexĩnũẽãma rĩ Tupanacax pemaxẽãma ega ngũxũ pingegũgu. ¹¹Rũ yixema nũxũ tacuax na nataãẽgũxũ ga yema duĩxũgũ ga meã Tupanacax maxẽãmaxũ ga yexguma ngũxũ nũxũ ũpetũgu. Rũ pema nũxũ pecuax ga ñuxãcũ meã namaxama ga guma Yox ga yexguma ngũxũ nũxũ ũpetũgu. Rũ nũxũ pecuax ga yixcama ga na ñuxãcũ tóru Cori ya Tupana poraãcũ nũxũ rĩngũxẽẽxũ. Erũ nũma ya tóru Cori ya Tupana rĩ namecũmaxũchi rĩ poraãcũ nũxũ tangechaũtũmũũgũ. ¹²Rũ guxũãrũ yexera, Pa Chaueneẽgũx, rĩ ngẽxguma țacũcax ĩpexunetagu, rĩ tama name i Tupanaẽgagu ĩpexuneta, rĩ exna ñoma i naãneẽgagu ĩpexuneta, rĩ exna țacũ i to i naẽgagu ĩpexuneta. Natĩrũ ngẽxguma aixcũma yixĩgu i wũxi i ore ĩrũ noxtacũma: “Ngũ” ñapegũ! Rũ ngẽxguma tama aixcũma yixĩgu i wũxi i ore ĩrũ noxtacũma: “Tama” ñapegũ! Rũ ngẽxguma ya Tupana rĩ tãũtãma pexũ napoxcue naxcax i ngẽma perũ uneta. ¹³Rũ ngẽxguma wũxie i petanũwa naxĩxãchiãẽgu, rĩ name nixĩ na tayumũxẽxũ. Rũ ngẽxguma wũxie taãẽgu, rĩ name nixĩ na tawiyaexũ rĩ Tupanaxũ ticuaxũũxũ. ¹⁴Rũ ngẽxguma wũxie i petanũwa ĩdaawexgu, rĩ name nixĩ i naxcax peyaca i yaxõgũxũãrũ ãẽxgacũgũ na tũmacax nayumũxẽgũxũcax rĩ Cori ya Tupanaẽgagu chixũmaã tũxũ yangõgũgũxũcax. ¹⁵Rũ ngẽxguma aixcũma Tupanaãxũ yaxõgũãcũma nayumũxẽgũgu, rĩ tá tũmacax nitaane, rĩ nũma ya Cori ya Tupana tá tũxũ ĩnarũdaxẽẽ nawa i tũmaãrũ ãawe. Rũ ngẽxguma chi țacũ rĩ pecadu taxũxgu,

rü Tupana tá tüxü nüxü nangechaü.
¹⁶Rü ngēmacax name nixi i pegümaã
 nüxü pixu i perü pecadugü rü pegücax
 peyumüxēgü i wüxiechigü na pexcax
 yataaneğüxücax. Rü yima mecü ya
 yatüarü yumüxē rü aixcuma naporä erü
 Tupana nanangāxü. ¹⁷Tupanaärü orearü
 urü ga Ería nixi ga wüxi ga yatü ga
 taxrü ixicü. Natürü yexguma nüma
 guxü ga norü ngüchaümaã nayumüxēgu
 na tama napuxücax, rü tomaēxpüx ga
 taunecüarü ngāxügu rü tama napu ga
 yema nañnewa. ¹⁸Natürü yemawena rü
 wenaxärü nayumüxē ga Ería rü pucücax

ínaca. Rü wenaxärü napu. Rü narüxü ga
 guxüma ga nanetügü. ¹⁹Pa
 Chaueneëgüx, ngëxguma chi texé
 petanüwa Tupanana ixügachigu, rü
 tangëxmagu ya wüxie ya tüxü
 taeguxēéxē na wenaxärü Tupanawe
 tarüxüxücax, rü mexü taxü. ²⁰Erü
 ngëxguma texé Tupanacax
 nataeguxēëgu i wüxi i duüxü nüxna i
 norü chixexü, rü tümagagu Tupana tá
 nanamaxēë i ngēma duüxü, rü tá nüxü
 nüxü nangechaü i norü pecadugü.

*Rü nuãma pexna,
 Chaütiágu*